

= SU PUDDITTU =

Non bolas, non b'hat afficcu  
de ti pesare in s'aera!  
Est una vana chimera  
sa chi giughes in pinniccu.

Dadi paghe a su turmentu,  
bista cun s'ala serrada:  
Ca natura s'est mustrada  
tropp'ingrata in naschimentu.

Pro chi sias vanitosu  
tra sos abiles non sese:  
T'illudes cando ti crêss  
fagher bolu poderosu.

Medas boltas has proadu  
a bolare che puzone:  
ma fit solu illusione  
basciu- basciu ses restadu.

T'arrabatas, ti peñeas,  
ti pones in oriolos,  
m'a leare largos bolos  
sunu sonnos, sun bideas.

Ciu - ciu sun cantende  
sos puzones in s'altura,  
mentres tue in sa basciura  
terra - terra ses bolende.

Bolu zertu non nde agattas  
chi presumas, chi ti 'antes:  
" alas muzas e pesantes  
a bolare non sun fattas "

Ansicora

*Manenti*  
*Marta*

Se l'aurora arderà  
sui tuoi graniti,  
tu lo dovrai Sardegna  
ai nuovi figli  
S. Satta

= PRO TE SARDIGNA =

S'ora est sonada! Current fijos tuos  
cun sa lampara azzesa, e sun dezisos  
de giopere a sa chima 'e su destinu  
cun su saccu pesante 'e su passadu:

Duru passadu de sos mannos nostros  
garrigu de dolore e de piantu  
de martiriu e de pena, c'had'abertu  
sulcos profundos in su coro sardu.

Ma sa tempera forte 'e sos zigantes,  
c'han pesadu a s'aera sos nuraghes,  
vivet ancora, e giughet in sas venas  
su samben de s'antiga razza sarda.

Current cun lughe in fronte, e han'in coro  
s'amore pro sa terra, e i s'ispera  
chi s'avveret pro te, Sardigna amada,  
su desizu, su sonnu 'e Bustianu.

Est'aspru su caminu, e seminadu  
de acutas ispinas, e infustu  
de lagrimas amaras e suspiros  
c'han versadu 'e continu sos eroes:

Cuddos sardos eroes c'han gherradu  
cun su brazzu, cun s'arma e cun sa pinna,  
in d'ogni campu 'e su progressu umana,  
pro ch'enzerat cust'ora plus presta.

Ed'est bennida s'ora! E già s'intenden  
sos cantigos de s'arte e de s'ischire  
pesados a s'aera, in segnale  
de su sardu caminu luminoso:

E s'aberit sa terra cun amore  
dende tottu sos fruttos e sabores  
chi segretos teniat inserrados  
in s'intima e profundu sinu sou;

E s'alzan a sos chelos sas fumadas  
de modernas sonantes officinas;  
e current in sos mares sos vapores  
cun sa bandela 'e su progressu sardu.

Est custa s'ora! Custa est su momentu  
de toccare sa chima 'e su destinu!  
Sun cun issos sos fortes, sos mazores,  
sos mannos nostros cun s'alenu insoro.

Ansicora.